

**Erkin Vohidov**

# **QIZIQUVCHAN MATMUSA**

Yoshlar nashriyot uyi  
Toshkent –2018

**UO'K 821.512.133-36**  
**KBK 84(5Ÿ)6**  
**B 89**

**Vohidov, Erkin.**

Qiziquvchan Matmusa [Matn]: hajviya / E. Vohidov. - Toshkent: Yoshlar nashriyot uyi, 2018. - 96 b.

*Ushbu kitobga sevimli shoirimiz Erkin Vohidovning turli yillarda yozilgan she'rlari jamlangan. She'rlardagi yengil kulgu, til jozibasi, tiniq kayfiyat e'tiboringizni tortadi.*

**UO'K 821.512.133-36**  
**KBK 84(5Ÿ)6**

**ISBN 978-9943-5316-9-7**

**© Yoshlar nashriyot**  
**uyi, 2018**

## MATMUSANING QISHLOG‘I

Donishqishloq degan joy  
Bordir bizning tomonda.  
O‘sha qishloq ahlidek  
Dono xalq yo‘q jahonda.

Jo‘yak tortib tomiga  
Makka ekkan o‘shalar.  
Kalishini perronga  
yechib ketgan o‘shalar.

Qop ganchni bir yo‘la  
Suvga qorgan u yerlik.  
Echkini sartaroshga  
Olib borgan u yerlik.

Ko‘rib minoralarni  
O‘sha yerlik ulug‘lar.  
Degan: «Bular teskari  
Turib qolgan quduqlar».

Tomdan boshlab uy qurmoq  
bo‘lib tikkan havoza,  
Devori yo‘q hovliga  
O‘rnatgan hamdarvoza.

Oyga chiqmoq yo‘li bor,  
Juda oson degan ham,  
Temir yo‘lni ko‘tarsa,  
Tayyor narvon degan ham.

Mashinasi bor turib  
Minib yurgan xachirga,  
Xizmat qilgan «Volga»si  
Eshakka yem tashirga.

Pashshaga sopqon otgan,  
Qopqon qo‘ygan chivinga,  
Almashtirgan sarrofdan  
O‘tgan kunni indinga;

Oy nuriga xum tutib,  
Umid qilgan pishloqdan –  
Sohibxayol farishta  
O‘sha Donishqishloqdan.

Donishqishloq qayerda?  
O‘zimizning tomonda.  
O‘sha qishloq xalqidek  
Dono xalq yo‘q jahonda.

Aql ko‘plik qilsa, bosh  
Yoriladi deb halak –  
Boshlariga donolar  
Kiyib yurar chambarak.

Sodda demang ularni,  
Ular sodda bo‘lmaydi.  
Kuldirsa ham sizlarni,  
O‘zlari hech kulmaydi.

U mashhur Aldarko'sa,  
Kalko'saning qishlog'i.  
O'zimizning qahramon  
Matmusaning qishlog'i.

Kitob bo'lar ta'rifi,  
Yozsa ming bir sahifa.  
Donishqishloq ahlidan  
Tinglang uch-to'rt latifa...

## MATMUSANING QALPOG‘I

Qalpoq oldi Matmusa,  
Qalpoq desa – qalpoqday.  
Uni kiyib Matmusa,  
Yigit bo‘ldi chaqmoqday.

O‘nta qo‘yga arziydi,  
Yaraqlashi bir jahon.  
Bir qarasang – suvsardek.  
Bir qarasang – olmaxon.

Qalpoq emas – ertak u,  
Qalpoq emas – tilla toj!  
Qo‘ying-chi, restoranda  
Yuvmasa hech yo‘q iloj.

Kirdilar, o‘ltirdilar,  
Buyurdilar araqni.  
Dono Matmusa uchun  
Ichdilar bosh qadahni.

Qalpoqqa teri bergan  
Suvsar uchun ichdilar.  
Shunday qalpoqni sotgan  
Ovsar uchun ichdilar.

Eslanmagan qishloqning  
Itigacha qolmadi.  
Maqtalmagan qalpoqning .  
Ipigacha qolmadi.

Xo‘p ichdilar o‘ylamay  
Hisob-kitob qilmoqni.  
Oxirida pul yetmay,  
Topshirdilar qalpoqni.

## MATMUSANING LAGANI

Matmusavoy shahardan  
Lagan olib qaytardi.  
Yo'l-yo'lakay o'y surib,  
O'z-o'ziga aytardi:

Bu laganni ko'tarib  
Olib borsam qishloqqa,  
Xotin uni albatta,  
Idish qilar pishloqqa.

Tiyib bo'lmas hech qachon  
Bola-chaqa deganni.  
Ular pishloq talashib  
Sindirishar laganni.

Shunda izlab chegachi  
Men notavon bechora,  
Qayta kelib shaharga  
Bo'ladirman ovora.

Mashoyixlar gapi bor  
Ish ko'zini bil, degan.  
Har yumushda ertaning  
Hisobini qil, degan.

Nima qilsam ekan deb,  
Bir dam o'yga toldi u.  
So'ng laganni sindirib,  
Chegalatib oldi u.

Shunday qilib, uyiga  
Qaytdi og'zi quloqda.  
Hamma uning aqliga  
Qoyil qoldi qishloqda.

## MATMUSANING CHARXPALAGI

Polvon edi Matmusa,  
To‘rt fil kuchi jam edi.  
Qishloqda eng zo‘r, ammo  
Aqli bir oz kam edi.

Matmusani shundan hech  
Ko‘zga ilmas edilar.  
Qo‘rqsalar ham undan, hech –  
Hurmat qilmas edilar.

Bir kun dedi Matmusa,  
Shunday kuchga egamen.  
Shuhratim yo‘q el aro,  
Beobro‘man nega men?

Ot ko‘tardim tish bilan,  
Kuldi faqat odamlar.  
Arzimagan ish bilan  
Topdi hurmat odamlar.

Men ham aqlim ko‘rsatib  
Hayron qilay hammani.  
Dono bo‘lib bir o‘zim,  
Nodon qilay hammani.

Bo‘z ariqda ko‘p zamon  
Bor eski bir charxpalak.  
Ko‘ribdiki, bir tomon  
Aylanar u g‘ildirak.



Balki ming yil narida  
Aylangandir shu yo'sin.  
Matmusaning davrida  
Yangilik bir ish bo'lsin.

Turdi bir oz o'y surib,  
Yurdi shaxdam ilgari.  
Charxpalakni sug'urib  
Shartta qo'ydi teskari.

Bu ijoddan el darak  
Topdi sahar pallada.  
Jadal chopar charxpalak,  
Lekin suv yo'q dalada.

O'ylar ahli ulamo  
Tuzatmoqning yo'lini.  
Mag'rur turar Matmusa  
Belga qo'yib qo'lini.

Kim charxpalak kosasin  
Yalpoq qilish kerak, der,  
Kim kosaga osma sim  
Qopqoq qilish kerak, der.

Der idroki eng yuksak  
Qashib turib kallani:  
– Daryoni sal ko'tarsak.  
Sal tushirsak dalani...

– Yo'q, ish bitmas «sal» bilan!  
Qishlog'imiz erlari  
Charxpalakni gal bilan  
Aylantirsin teskari.

– Yo‘q, kuchimiz ojizroq,  
Qiynalmasin el joni.  
Teskoriga oqizmoq  
To‘g‘ri bo‘lar daryoni.

Emish, hamon qilar bahs  
O‘sha qishloq erlari.  
Charxpalak-chi, suv bermas,  
Aylanarmish teskari.

## MATMUSANING TANDIRI

Matmusaga bir kuni  
Xotini: «Hoy, er, – dedi.  
Hammada bor, menga ham  
Tandir qurib ber», dedi.

Pishiq edi Matmusa,  
Boshga qo'yib qo'lini,  
O'ylab topdi eng arzon  
Tandir qurmoq yo'lini.

Dehqonchilik – somon, jun,  
Loy qorishni biladi.  
O'zi tayyor qolip-ku,  
Nega pul sarf qiladi?

Loyni qordi, ishlatib –  
Zang ketmon-u paqirni.  
So'ng oftobga cho'k tushib,  
Bolalarni chaqirdi.

Qiyqirishib bolalar  
Atrofida chopdilar.  
Qorni, bo'yni aralash  
Loyshuvoqni yopdilar.

Bundoq tandir bo'lmagan,  
Yo'qdir hech bir kitobda.  
Tandirini Matmusa  
Quritadi oftobda.

Qotgan sari tanda loy,  
Har bir mo'yi jimirlar.  
Chig'anoq qurt singari  
Faqat boshi qimirlar.

Ko‘p qiynaldi Matmusa,  
Mard emasmi – chidadi.  
Tandir tayyor, endi mard  
Undan qandoq chiqadi?

Pilla yorar kapalak,  
Qil sug‘rilar xamirdan.  
Lek Matmusa chiqolmas  
O‘zi qurgan tandirdan.

Yetar yetti qo‘shniga  
Uning nola-xonishi.  
Maslahatga yig‘ilar  
Qishloq ahli donishi.

Kim der: E voh, bechora,  
Kim der: Ko‘ring taqdirni.  
Bahs boshlandi – masala:  
Butun olmoq tandirni.

Oxir dedi bosh hakam,  
Chimirgancha qoshini:  
– Bir chora bor: arralang  
Matmusaning boshini.

Mayli, dedi Matmusa,  
Rozi bo‘lmay netayin,  
Bilmadinglar qadrimni,  
Hammang jinni, betayin.

Kessangizlar boshimni,  
Men niyatga yetarman.  
Boshim olib bu yerdan  
Biror yoqqa ketarman.

## MATMUSANING UYLANISHI

Safar qildi Matmusa  
Olisdagi shaharga.  
Ul shaharda yoʻliqdi  
Bir hur pari-paykarga.

Boʻydoq edi Matmusa,  
Uzoq turmay oʻylanib,  
Qishlogʻiga qaytdi u  
Ul sanamga uylanib.

Hech gap emas baxt kelsa,  
Aytar omad deb buni:  
Uch oy oʻtmay jononning  
Yaqinlashdi oy-kuni.

Hamma hayron, hamma lol:  
«Biz bir yilcha kutardik,  
Matmusaning xotini  
Chiqib qoldi udarnik».

Ne ekan deb, shoshilib  
Zarbdorlikning bu siri,  
Chopib keldi suhbatga  
Donishgazet muxbiri.

«Biz ham chetda emasmiz,  
Biz ham sherik mehnatga»,  
Deb Matmusa tirjayib,  
Qoʻshiladi suratga.

Ertasiga bu xabar  
Tarqab ketdi har yoqqa.  
Sarlavha ham chiroylik:  
«Ilgʻor oʻrnak – qishloqqa».

Xat yogʻilar erlardan:  
Tashabbusni qoʻllaymiz!  
Xotinlarni tajriba  
Almashishga yoʻllaymiz!

«Alvon-alvon shiorlar  
Paydo boʻlar har joyda:  
«Yangilikka – katta yoʻl!»  
«Toʻqqiz oyni – uch oyda!»

Hayʻatlarda kekkayib  
Yayrab yurar Matmusa.  
Biz undoq, biz bundoq deb  
Sayrab yurar Matmusa.

Alqissa shu – baʻzida  
Shunday boʻlib qoladi –  
Birov qilib mehnatni,  
Birov obroʻ oladi.

## QIZIQUVCHAN MATMUSA

Oppoq ko‘ylak, yangi shim  
Kiyib olib bayram kun,  
Uyga qaytar Matmusa  
Shirin bo‘lib kechqurun.

Qaytar zavqqa qo‘shib zavq,  
Ham kuch qo‘shib kuchiga.  
Bir payt ko‘rsa, allakim  
Simyog‘ochning uchiga –

Qog‘oz osib qo‘yibdi,  
Ikki qator yozib xat.  
O‘qimoqqa Matmusa  
Harchand qilar harakat –

U tomondan qaraydi,  
Qaraydi bu tomondan.  
Bilmay ketsa ne xat bu,  
Chiqa olmas armondan.

Qiziquvchan ishtiyoq  
Unga tinchlik bermasdi.  
Ko‘ylakni ham ayamay  
Simyog‘ochga tarmashdi.

Chiqdi, ko‘rdi, o‘qidi,  
Kim aqldan ozibdi?  
«Ehtiyot bo‘l, simyog‘och –  
Bo‘yalgan», deb yozibdi.

O'qidi-yu tanidan  
Chiqib ketdi muzdek ter,  
Uyga kelib daftarga  
Yozib qo'ydi to'rt yo'l she'r:

«Ey, odamlar, bilishdan  
O'zingizni tiymanglar.  
Qiziquvchan bo'lsangiz,  
Yangi ko'ylak kiymanglar!»



## MATMUSA – RASSOM

Ko'chma muzey kelibdi  
Bizning Donishqishloqqa.  
Eshitdi-yu Matmusa,  
Shoshib qoldi u yoqqa.

Ko'rdi borib mo'ylovdor  
Qilich taqqan zotlarni.  
U zotlarning ostida  
Gijinglagan otlarni.

Ayniqsa, deng, ayollar,  
Qarab-qarab oldi u.  
Boqib ba'zi suratga,  
Surat bo'lib qoldi u.

Biri biridan qiziq,  
Bir-biridan zo'r, ammo  
Abstrakt san'atga  
Tushunmadi mutlaqo.

Dedi: shu suratga ham  
Pul to'lashar, hoynahoy.  
Demak, rassom ishi zo'r,  
Demak, rassom juda boy.

Dedi: san'at kim uchun?  
San'at hamma uchunmi?  
Men ham endi bu ishda  
Sinab ko'ray kuchimni.

Qat'iyatli – Matmusa,  
U og'ziga so'z oldi.  
Uyga kelib sandiqdan  
Paytavalik bo'z oldi.

Tog'oraga rang qordi,  
Bo'lsin uchun sozgina,  
Qo'shdi tarnov suvidan,  
Qo'y qiyidan ozgina.

Qo'lcho'pni siz so'ramang,  
Topqirliqdan kamoli –  
Guldek mo'yqalam bo'ldi  
Echkisining soqoli.

Toldan yog'och kesdi-yu  
Chorcho'pni ham bopladi.  
So'ng u turfa matoga  
Turfa rangni chapladi.

Qarabsizki, rasmtaxt,  
Shartta qo'yib imzoni,  
Olib keldi muzeyga,  
Lol qilgani dunyoni.

Ko'rinarli joy topib,  
Osdi uni devorga,  
Allaqanday «izm» deb  
Yozib qo'ygan qatorga.

Ertasiga keldilar  
Mutaxassis xodimlar.  
Ya'ni, o'sha «izm»ning  
Piri bo'lgan olimlar.

Qaradilar, koʻrdilar.  
Hech tish oʻtmas anglarga.  
Kim der: Koʻring uslubni.  
Kim der: Qarang, ranglarga.

Bu gʻarbdagi zoʻr usul  
Antirasm, der birov.  
Primitivizmda  
Yangi oqim, der birov.

Xullas, koʻchma muzeydan  
Bu surat ham joy oldi.  
Matmusaga pul chiqib,  
Bitta samantoy oldi.

Ey, yoronlar, borsangiz  
London, Parij, Rumoga,  
Muzeylarda bir qarang  
Oʻsha tanish imzoga.

Jilva qilib oʻzgacha,  
Boʻy taratib turibdi.  
Matmusa chizgan surat  
Dunyo kezib yuribdi.

## MATMUSANING DUTORI

Matmusa qo'y sotgani  
Shaharga kelib qoldi.  
Qaytishda bitta qo'yning  
Puliga dutor oldi.

Uyga kelgach, yo'lakka  
Bog'ladi-yu otini,  
Zavqi sig'may yurakka,  
Chaqirdi u xotinni.

Mana, xotin, ko'rib qo'y,  
Manovni dutor deydi.  
Manov bog'ichni parda,  
Manov ipni tor deydi.

Manov quloq, bu xarrak,  
Ya'ni, eshak boladir.  
Shaharlik uni bunday –  
Bunday qilib chaladir.

«Munojot» deb otini,  
Matmusa kuy chalibdi.  
Quloq solib xotini,  
Rosa qoyil qolibdi.

Depti:  
Rahmat, shaharlik –  
Yaxshi cholg'u beribdi,  
Faqat bitta narsaga  
Aqlim yetmay turibdi.

Bir mahal bobomda ham  
Shunday cholgʻu bor edi.  
Esimdan adashmasam,  
Oʻsha ham dutor edi.

Lekin u chalmay turib,  
Qulogʻini burardi.  
Barmogʻi ham manov ip  
Ustida yugurardi.

Sen boʻlsang bitta yerni  
Tutgancha qolaverding.  
Bir xil tingʻir-tingʻirni  
Qoʻymasdan chalaverding.

Jahli chiqib Matmusa,  
Xotinini soʻkibdi.  
Ketgan qoʻyi uchun ham  
Alamini toʻkibdi:

«Ey, xotin, sen eringga  
Nodon gapni deb qoʻyding.  
Nima boʻldi?  
Yo qarib  
Es-hushingni yeb qoʻyding?

Bobong qoʻli dutorda  
Yugursa, yugurgandir.  
Shoʻrlik kerak pardani  
Topolmay qidirgandir.

Endi men chalganimda  
Ogʻzingni yum, jim, depti:  
Bobong parda qidirgan,  
Men uni topdim», depti.

Matmusa shunday qilib,  
Ko'ragini keribdi.  
Erini dono bilib  
Xotin ham tan beribdi.

Alqissa shu:  
Mashshoqlar –  
Qidirishni tashlasin.  
Kerak pardani topgan  
Matmusalar yashasin!

## TANDIR KIYGAN MATMUSA

O'zi tandir qurolmay,  
Ko'nib oxir taqdirga,  
Shahar tomon yo'l oldi  
Matmusavoy tandirga.

Tandir bozor qizigan,  
U tushgacha aylandi.  
Va nihoyat bozorning  
Zo'r tandiri saylandi.

Chertsa, uch kun jaranglar,  
Bir umrga yetadi.  
Lekin uni qishloqqa  
Qanday olib ketadi?

O'ylab ko'rsa, eshakka  
Ortmoqning yo'q chorasi.  
Ortganda ham arqonlab  
Tortmoqning yo'q chorasi.

Ahli bozor yig'ildi,  
Qizib ketdi maslahat.  
Barchada bir shu tashvish,  
Hammada shu o'y faqat.

Kengashildi, o'ylandi,  
Mindirildi oxiri.  
Eshagiga – Matmusa,  
Matmusaga – tandiri.

U shod, bundoq tadbirni  
Topmas eng zo'r topqir ham.  
O'zi yayov qolmadi,  
Zap o'rnashdi tandir ham.

«Hayyo-hayt» deb yo‘l oldi  
Donishqishloq tomonga.  
Mana, tandir ichidan  
Qarab borar osmonga.

Har qanchaki intilar  
Matmusa yo‘l ko‘rolmas.  
Mening uyim qayda? – deb  
Odamlardan so‘rolmas.

Ketib borar tavakkal,  
Ko‘kka qarab «Tangrim!» – der, –  
Meni qilma sharmanda,  
Eshagimga aql ber».

Bedapoya ko‘rganda  
Eshak sho‘rlik netadi?  
Qishloq qolib mag‘ribda,  
Mashriq tomon ketadi.

Kun botar-u shom tushar,  
Yulduz chiqar osmonga,  
Hamon borar Matmusa,  
yetmas manzil-makonga.

Deydilarki, to bu dam  
Yo‘lda emish Matmusa.  
Boshi ham yo‘q, cheki yo‘q  
Cho‘lda emish Matmusa.

Ayo do‘stlar, adashgan  
Bir mo‘mindan kulmaylik.  
Matmusadek o‘zimiz  
Tandir kiygan bo‘lmaylik!



## MATMUSANING MEHMONDO‘STLIGI

Mehmon juda azizdir  
Donishqishloq tomonda.  
Derlar, mayli biz o‘lsak,  
Mehmon bo‘lsin omonda.

Mana, shaharlik mehmon  
Qishloq kezib yuribdi.  
Unga go‘zal tabiat  
Ma’qul bo‘lib turibdi.

Ayniqsa, to‘polon soy  
Mehmonga yoqib ketdi,  
Oh-oh deb suvga tushdi,  
Tushdi-yu, oqib ketdi.

Goh cho‘kar, goh ko‘rinar,  
Dod solar: «Qutqaringiz»,  
«Spasite», «dast bideh»,  
«O my friend, help me, please».

Ispancha, portugalcha,  
Lotincha qichqiradi.  
Belni ushlab Matmusa  
Hayron bo‘lib turadi.

«Shuncha tilni o‘rganib  
Boyvachcha bo‘larmiding?  
Undan ko‘ra suzishni  
O‘rgansang o‘larmiding».

Ovozi o'chganida  
Suv kirib tomog'idan,  
Mehmonni olib chiqdi  
Ushlab bo'yin bog'idan.

«Shaharlik shaharlik-da»  
Der Matmusa ko'nglida,  
«Kerakli arqonini  
Olib yurar bo'ynida».

Qirg'oqqa chiqdi shoshmay,  
So'ng aqlini yuritib,  
Arqonidan daraxtga  
Osib qo'ydi quritib.

## MATMUSANING QO‘SHIG‘I

Beish qoldi Matmusa,  
Endi ne qiluv kerak?  
Bir tovuqqa, albatta,  
Ham don-u ham suv kerak.

Bekor qolsang yostiq ham  
Yonboshingga botadi.  
Televizorga tokay  
Termilgancha yotadi?

Oinai jahonda  
Kuylamagan og‘iz yo‘q.  
O‘ylab ko‘rsa o‘zidan  
O‘tadigan hofiz yo‘q.

O‘yladi, avval boshni,  
So‘ng yonboshni qashladi.  
To‘rtta odam yig‘ilsa  
Qo‘shiq aytaboshladi.

Eshitarmi odamlar,  
Eshitmasmi, ishi yo‘q?!  
«Bog‘ aro»ni ko‘tarar,  
Bas, deydigan kishi yo‘q.

O‘zi bo‘lar mahliyo  
O‘zi aytgan kuylarga.  
Taklif bo‘lsa, bo‘lmasa  
Boraverar to‘ylarga.

Matmusa kelgan yerdan  
Qochar bo‘ldi odamlar,  
Tunlar quloqqa yostiq  
Bosar bo‘ldi odamlar.

Oqsoqollar dedilar:  
Bir ilojni o‘ylaylik.  
Matmusani qishloqqa  
To‘ra qilib qo‘yaylik.

Bo‘lsa katta amaldor,  
Kursisi baland bo‘lsa,  
Majlis, qabul, nutq, safar...  
Xullas, doim band bo‘lsa,

Balki qo‘shiq aytishga  
Vahti qolmas, ulgurmas.  
Amalidan uyalib  
Hofizlikni ep ko‘rmas...

Kelishdilar, Matmusa –  
Endi qishloq to‘rasi.  
Ko‘payib qoldi, ko‘ring,  
Qadrdoni, jo‘rasi.

U kursida o‘ltirar,  
Qo‘lni qo‘yib beliga.  
Yana ham qiyin bo‘ldi  
Donishqishloq eliga.

Kimki biror ish bilan  
Huzuriga kiradi –  
Matmusa arz eshitmas,  
Qo‘shiq aytib beradi.

Chidab sukut saqlagan  
Marhamatga esh bo'lur.  
Qo'shig'ini maqtagan  
Albat ishi besh bo'lur.

Oqibat Matmusaning  
Kasali battar bo'ldi.  
Sahar boshlab ashula  
Kechgacha aytar bo'ldi.

Oqshomlari guzarda  
Avjni olib turadi.  
Eshitsang-ku xo'b-u xo'b,  
Eshitmasang – uradi.

To'ra bo'lgach, boshqa xil  
Ovozlarni yo'qotdi.  
Meni mazax qildi, deb  
Xo'rozlarni yo'qotdi.

Donishqishloqda endi  
Boshqa biror qo'shiq yo'q.  
Birgina Matmusaning  
Qo'shig'iga to'siq yo'q.

Odamlar ijirg'anib,  
Qarg'ab, quloq soldilar.  
Iloj qancha, oxiri  
O'rganib ham qoldilar.

Hatto qo'msab, noyob deb,  
So'ylar bo'ldi xaloyiq.  
Matmusaga o'xshatib  
Kuylar bo'ldi xaloyiq.

Qarsak, olqish, madhiya  
Avjga chiqib basma-bas,  
Xalq dedi: bizga endi  
Boshqa qo‘shiq kerakmas.

Hammamiz bu qo‘shiqning  
Fidoyisi bo‘larmiz.  
Uni aytib yashadik,  
Uni aytib o‘larmiz.

Alqissa, bulbuli yo‘q,  
Xo‘rozi yo‘q ul ma’vo –  
Donishqishloqda hamon  
Yangrar yolg‘iz bir navo.

## MATMUSA VA O'G'RILAR

Savdo qilib Matmusa  
Qaytar ekan yo'liga  
Tushib qoldi shaharlik  
O'g'rilarning qo'liga.

Yechintirdilar avval,  
So'ng do'pposlab urdilar.  
O'chsin deya ovozi  
Karnay chalib turdilar.

Shu-shu, ko'p yil Matmusa  
Bu shaharga qaytmadi.  
Ichga yutdi alamin,  
Hech kimsaga aytmadi.

Aytsa nima, el faqat  
Kulgi qilar ermaklab...  
Qariganda nihoyat  
Nabirasin yetaklab –

Matmusa yana o'sha  
Shahar sari yo'l oldi.  
Bu safar katta to'yning  
Ustidan chiqib qoldi.

G'at-g'at karnay, nog'ora  
Takatumni urardi.  
Matmusadan nabira  
Bu nima, deb so'rardi.

Bobo aytar: bu ishni  
Mendan soʻrma, bolajon,  
Bir shoʻrlikni, hoynahoy,  
Qilmoqdalar chalajon...

Doʻstlar kulmang, bu hikmat  
Matmusadan qariroq,  
Nogʻora-yu karnaydan  
Yuring doim nariroq.



## MATMUSANING AMERIKA OCHISHI

Gazeta o'qib yotib  
Matmusa o'y o'yladi.  
Elni yig'ib ertalab  
Shunday bir nutq so'yladi.

Donolar! Sizga aytay  
O'ylagan bir xayolim.  
Uni aytishdan avval  
Bordir bitta savolim.

Ayting, Amerikaga  
Kim dastlab qo'ygan qadam?  
Kolumbmi? Yo'q! Xitoylar –  
Besh ming yilcha muqaddam.

Ular borgan kunchiqar,  
Ya'ni bizning tomondan.  
So'ng bu qit'ani ochgan  
Kolumb narigi yondan.

Endi men sizga aytsam  
Maqsad-u muddaoni:  
Bizning zamon nomchiqar  
Ish qilmoqning zamoni.

Kiroyi dong taratsak  
Dunyoga tarataylik.  
Amerika ochmoqqa  
Yangi yo'l yarataylik.

Kirishsak Xitoyni ham  
Kolumbni ham yiqamiz.  
Shu joydan yer kavlasak  
Nyu-Yorqdan chiqamiz.

Lekin bizlar qaziymiz  
Qishloqning etagidan.  
Shunda teshib chiqamiz  
Naq Oq uyning tagidan.

Jahonni lol qoldirib  
Shuhrat olib qaytamiz.  
Prezidentni shartta  
Qopga solib qaytamiz.

Jahonshumul inqilob  
Bundan oson hal bo‘lmas.  
Yer yuzida shundan so‘ng  
Boy-u kambag‘al bo‘lmas.

Matmusaga qarsaklar  
Ostida to‘n yopildi.  
Ammo – lekin ba’zi bir  
«Mujmal»lar ham topildi.

Kimdir dedi: – Bu ish zo‘r,  
Menda faqat bir xayol:  
yer darz ketsa, ikkiga  
Bo‘linishi, ehtimol.

Birov dedi: – Biz agar  
yer sharin teshib qo‘ysak,  
G‘o‘rillab shamol ursa  
Bo‘lasmikin yelvizak?

Va lekin Matmusani  
Yoqlab ketdi ko‘pchilik.  
Vahima qilganlarni  
Boplab ketdi ko‘pchilik.

Donishqishloq shu kundan  
Boshqa ishni tashladi.  
Matmusa aytgan joydan  
Xandaq kavlay boshladi.

Rosa terga tushdilar,  
Kun tobida, yer zarang.  
Ish bitay degan chog‘da  
Suv chiqib qoldi, qarang.

Ishga tushdi paqirlar,  
Bir zum orom bo‘lmadi.  
Kechgacha suv tortdilar,  
U hech tamom bo‘lmadi.

Tirishdilar kun bo‘yi,  
Ertalab tirishdilar.  
Bo‘lmagach, boshqa yerni  
Kavlashga kirishdilar.

Donish ahli chayir xalq,  
Donish ahli ko‘p shovvoz.  
yer qazib, suv chiqarib  
O‘tdi ko‘p qish va ko‘p yoz.

Bu mehnatdan ko‘mildi  
Yarim qishloq tuproqqa.  
Qolgan yarmi aylandi  
Qurbaqazor botqoqqa.

Ko‘p vaqtqi, Donishqishloq  
Mingquduq deb atalar.  
El ichida Matmusa  
Mirquruq deb atalar.

Lekin u yo‘ldan qaytmas,  
Der, bu yo‘l haq yo‘lidir.  
Xalq uni tanlagan, bas,  
Demak, u xalq yo‘lidir.

Simiramiz suv kelsa,  
Tosh kelsa kemiramiz,  
Ochamiz Amerika,  
So‘ng uni yemiramiz.

Yaqinda u qishloqdan  
Keldi yaxshi bir xabar.  
Pudratga o‘tganmishlar  
U yerda ham odamlar.

Borib ko‘rdim, shiddat zo‘r,  
Umid katta, ish katta.  
G‘ayrat qilgan bir joydan  
Teshib chiqar, albatta.

## MATMUSANING HAYKALI

Matmusa – buyuk odam!  
Matmusa zo‘r sarkordir!  
Unga, tirik bo‘lsa ham  
Haykal qurmoq darkordir!

Kelishdilar donolar,  
Tashabbuskor ko‘p edi.  
Matmusa-chi?  
U – kamtar,  
Yo‘q demadi, xo‘p dedi.

Juda katta shahardan  
Chaqirdilar ustani.  
Ish boshlandi sahardan,  
Ha, yashavor!  
Bos, qani!

Donolarda zo‘r g‘ayrat,  
Donolarda kuch katta.  
Lekin ulug‘ harakat  
Oson bo‘lmas albatta.

Kimnidir xarsang bosdi  
Kavlaganda tagidan.  
Kimdir arrada kesdi  
Yog‘och deb bilagidan.

Qorishmada bir dono  
Tizzadan botib qoldi.  
Botsa mayli-ya, ammo  
Sementda qotib qoldi.

Baribir deng ming olqish,  
Zafar qayda chekmay jon?  
Saraton boshlangan ish  
Xullas, bitdi qahraton.

Qiyqiriq, hay-hay bilan  
Maydonga el sochildi.  
G'ata-g'ut karnay bilan  
Ko'ring, haykal ochildi.

Siz bundoq ajib tasvir  
Ko'rmagansiz jahonda.  
Matmusa turar mag'rur  
Yaxtak, uzun ishtonda.

Xaloyiqqa ko'rsatib  
Baxt-saodat yo'lini,  
Polvon turar uzatib  
Mashriqqa o'ng qo'lini.

Chap qo'lida ushlagan  
Taqqasini g'ijimlab.  
Yonida chaynab yugan  
Eshak turar g'ijinglab.

Belbog'ida osig'liq  
Nosqovog'i yarashgan.  
Hammadan ham popuklik  
Ishtonbog'i yarashgan.

Ta'rifi ado bo'lmas,  
Hamma lol-u hayratda.  
Lekin bexato bo'lmas  
Zo'r asar ham albatta.

Qoʻlda taqya – koʻp ulugʻ,  
Usta uni doʻndirgan.  
Lek qoʻldagi esda yoʻq,  
Boshiga ham qoʻndirgan.

Poyabzal juda yaxshi,  
Faqat ozgina yanglish –  
Bir oyogʻida – mahsi,  
Bir oyogʻida – kalish.

Eshak ham oʻziga xos,  
Bordir andak chatogʻi:  
Qulogʻi bitta, xolos,  
Lekin beshta oyogʻi.

Bularga ahli donish  
Qilgani yoʻq eʼtibor.  
Chunki asosiy yanglish –  
Boshqa, ular koʻp hushyor.

Hammaga ham jon shirin,  
Axir shafqat kerak-da.  
Havo sovuq, izgʻirin,  
Nega haykal yaxtakda?

Shu holatda misli sham  
Sovuqda tursa uch kun,  
Matmusa ham, eshak ham  
Harom oʻlishi mumkin.

Muhokama vaqtida  
Matmusa ham bor edi.  
U ishonch-u ahdida  
Mahkam, ustivor edi.

Dedi qat'iy va keskin:  
Qaytadan qurmoq kerak!  
Haykal ustiga po'stin,  
Boshiga qalpoq kerak.

Esladi u jun paypoq,  
Paxtalik shimini ham.  
Dedi qiling qalinroq  
Eshak to'qimini ham.

El – botir, elga balli,  
El hujumga tashlandi.  
Matmusaga haykalni  
Qayta qurish boshlandi.

Ish bo'lmadi ozmuncha,  
Ko'plar bo'ldi qahramon.  
Yangi haykal bitguncha  
Yoz ham keldi – saraton.

Mana, quyosh o't purkar,  
Shiddat bilan bir yoqda.  
Bir yoqda haykal turar  
Pocha-po'stin, qalpoqda.

Xalq kular bu alfozdan,  
Qah-qah, mazax bitmaydi.  
Barcha der bir ovozdan:  
Bunaqasi ketmaydi.

Avvalgisi asli g'o'r,  
Xatosi bir qop edi.  
Ammo o'sha edi zo'r,  
O'sha bizga bop edi,



Ma'qulgina Matmusa  
Aqli – shayintarozi.  
Der: «Ko'pchilik ne desa  
Biz emasmiz norozi».

Yana mehnat. Yuz kuncha  
Ter to'kdilar bearmon.  
Yozgi haykal bitguncha  
Qish keldi-ku qahraton...

Kim bilsin bu charxpalak  
Aylanardi necha yil –  
Qishda – yozlik bo'z yaxtak,  
Yozda – qishlik shamoyil.

Lekin Matmusa bir kun  
Ishni shartta qildi hal.  
Dedi: to'rt fasl uchun  
Quringlar to'rtta haykal!

Xalq unga aytdi olqish  
To'rtta haykal quramiz!  
Bahor-u yoz, kuz-u qish  
Almashtirib turamiz!

Bu voqea yuz bergan  
Juda olis zamonda.  
Endi el aqli teran  
Donishqishloq tomonda.

Surishtirsa agarda  
Xalq yuz foiz savodlik.  
Olimlari shaharda  
Qilayotir ustodlik.

Borib ko‘rdim yaqinda  
Matmusa sog‘ yuripti.  
Endi yoz-u qish unda  
Bitta haykal turipti.

Eslab o‘tgan u ishni  
Hangomalar qilishar.  
Haykal – tosh,  
Yoz-u qishni  
Farq qilmaydi, bilishar.

Lek ehtiyot har holda  
Zarar qilmas hech qachon.  
Qish kelganda haykalga  
Yopib qo‘yishar chopon.

## MATMUSANING ESHAK SOTGANI

Matmusaning eshagi  
Aynib qoldi daf'atan.  
Yaqinlashib bo'lmaydi  
Na olddan, na orqadan.

Qo'shqavat arqonni ham  
Uzar bo'ldi haromi.  
Hangraganda olamni  
Buzar bo'ldi haromi.

Minib bo'lmas ustiga,  
Koptok qilib otadi.  
Bo'ldi endi. Matmusa  
Eshagini sotadi.

Lekin qadimdan qolgan  
Bozordagi qoida:  
Nima sotsang, aybini  
Aytish kerak joyida.

Hech kimsa Matmusadek  
Qiyin holga qolmaydi.  
Bachchag'arning aybini  
Aytsang, birov olmaydi.

Aytmasang – yana gunoh!  
Matmusa ko'p o'yladi.  
O'ylab-o'ylab bozorda  
Shunday deya so'yladi:

«Eshagim – arzon eshak,  
Kelabersin xaridor.  
O‘zi eshak bo‘lsa ham  
O‘nta otning kuchi bor.

Eshagim polvon eshak,  
Ko‘p xushnafas eshagim.  
Aybi bo‘lsa, birgina,  
Odam emas eshagim».

Bozor ahli kuladi:  
Shunaqa ham bo‘larmi?  
Eshak axir eshak-da,  
Eshak odam bo‘larmi?

Boshqa aybi bo‘lmasa,  
Bunday ulov qayda bor?  
Eshakni olib ketdi  
Arzonga bir xaridor.

Qutuldim deb azobdan  
Shukur aytdi Matmusa,  
Pulni hamyonga solib,  
Uyga qaytdi Matmusa.

Qaytdi-yu qotdi hayron  
Holat – xuddi kechagi.  
Og‘ilda bog‘liq turar  
Pishqirgancha eshagi.

Aftodahol xaridor  
Yig‘lab turar qoshida,  
Qo‘li, oyog‘i mayib,  
To‘rtta g‘urra boshida.

Matmusaga der: «Inson!  
Imoningdan qaytdingmi?  
Eshak sotding, tepadi,  
Tishlaydi, deb aytdingmi?

Eshak emas, to'ng'iz-ku,  
Bu maxluqing meni yer.  
Senda boshqa gapim yo'q,  
Eshakni ol, pulni ber».

Matmusa javob aytar:  
– Senga eshak sotganman.  
Hushyor bo'l, deb tayinlab  
Odammas, deb aytganman.

Endi qolma yo'lingdan,  
Men bilan gap talashma,  
Arzon deb bir adashding,  
Boshqa sira adashma.

Do'stlar!  
Siz ham Matmusa  
Hikmatin unutmanglar.  
Eshaklardan hech qachon  
Odamiylik kutmanglar.

## MATMUSANING BOG'I

Dono bo'lib Matmusa  
El ko'nglini chog' qildi.  
Donishqishloq chetidan  
Qo'riq ochib bog' qildi.

Bog' mevaga kirganda  
Yig'in bo'ldi kattakon.  
Matmusaga o'qildi  
Ming olqish-u sharaf-shon.

Qishloq uchun bog'ning ham  
Darkorligi bilindi.  
Matmusaga shu kundan  
Maosh tayin qilindi.

Bog' bor, bog'bon bor, endi  
Bir rahbar ham kerakdir.  
Ish ko'rgan bir ulug' zot  
Tayinlandi direktor.

Bog' bor, bog'bon bor, mana  
Rahbarlik bor, ish katta.  
Sekretarsiz, shofyorsiz  
Boshliq bo'lmas, albatta.

Boshliq bo'lmas, albatta  
Bir juft o'rinbosarsiz.  
To'rtta "zav"ga sakkizta  
Yordamchi ham zararsiz.

Cho‘t qoqishga o‘n kishi,  
Pul sanashga qirq odam.  
Yarim qishloq – zampompom,  
Yarimqishloq – pomzamzam.

Bir yil o‘tgach donolar  
Bog‘ni taftish qildilar.  
O‘rgandilar, hamma ish  
Joyida deb bildilar.

Faqat shtat qisqartish  
Zaruratga o‘xshadi.  
Buyruq bo‘ldi, Matmusa  
Bog‘bon ishdan bo‘shadi.

Ey siz, do‘stlar, borsangiz  
Bizning Donishqishloqqa –  
Qo‘nib o‘ting g‘aroyib,  
Bog‘boni yo‘q u boqqa.

O‘zingiz bir hisoblang  
Xodim ko‘pmi, qumursqa...  
Kirib oling siz ham bir  
Telefonlik yumushga.

*1976-1991*

## KELAJAKNING MATMUSALARI

Bir xo‘plam choy bahonasida  
Unut bo‘lar g‘am-g‘ussalari –  
Kelajakning choyxonasida  
Kelajakning Matmusalari.

Matmusaga aytar Matmusa:  
Shu yil uch yuz yoshga to‘laman.  
Oh, bir zumda shuncha yil o‘tsa!  
Yoqa ushlab hayron bo‘laman.

Javob aytar Matmusa: – «Adash,  
Uch yuz nima, besh yuzimda ham  
Juda shirin dunyoda yashash,  
Hech o‘lgisi kelmaydi odam».

Boshqasi der: – «Tez o‘tsa davr,  
Sabab kamroq bo‘lamiz yerda.  
Goh joyimiz Alfa Kentavr,  
Gohi manzil – Andromeda».

To‘rtinchisi aytar: – «O‘zinga  
To‘qman, yo‘qdir hech kimdan kamim.  
Bir tashvishim – «butlov qism»ga  
Ketayotir barcha topganim.

Yetti yuzga kirsada hamon  
Tashlamaydi otam aroqni.  
Almashtirdik o‘n uch oshqozon,  
O‘n sakkizta qora taloqni.

Yana aytar: – «Pul bor, oson bu,  
Kambag‘alga ammo ko‘p qiyin.



Bir tola soch million bo‘ldi-yu,  
Odam qadri bo‘ldi bir tiyin».

Yangi ming yil ostonasida  
Hasratlashar, ko‘p g‘ussalari –  
Kelajakning choyxonasida  
Kelajakning Matmusalari.

## QUMURSQALAR JANGI

Bir tup olma uzra kecha  
Juda katta jang bo'ldi,  
Boshlar ketdi necha-necha,  
Necha oyoq lang bo'ldi.

Hasharotlar urushgani  
Dahshat ekan,  
Qaradim.  
Oxir bitta qumursqani  
Ushlab olib so'radim:

– So'yla,  
Nechun bu mojaro?  
Nimadandir bu nifoq?  
Qumursqalar ahli aro  
Zo'r edi-ku ittifoq?

Qumursqavoy dushmanidan  
Uzib olgan oyoqni –  
Tuflab,  
Odam tili bilan  
Tushuntirdi nifoqni.

«Asli bizlar  
Bir tan, bir jon,  
Bir uyadan chiqqanmiz.  
Bir cho'p topsak,  
Ko'rsak bir don,  
Bir kovakka yiqqanmiz.

Shu paytgacha bir saf bo‘lib,  
Ne ish qilsak teng qildik.  
Bugun bir ish sabab bo‘lib,  
Uch guruhga ayrildik.

Kecha bir gap topdi bizning  
Tungi soqchi – tingchimiz.  
Eshitdig-u hammamizning  
Barbod bo‘ldi tinchimiz.

U tun bo‘yi bedor bo‘lib  
Ko‘kka qarab yuribdi.  
Unda sonsiz don sochilib  
Yotganini ko‘ribdi.

Qumursqalar bugun tongda  
Eshitib bu xabarni,  
Yo‘lga chiqdik o‘sha onda  
Kechiktirmay safarni.

Ahd qilganga yor deya baxt,  
Tuproq oshdik,  
Qum oshdik,  
Nihoyat, shu katta daraxt  
Tanasiga tirmashdik.

Maqsadimiz shu narvondan  
yetmoq edi osmonga...  
Ammo bir yo‘l  
Nogihondan  
Bo‘lindi uch tomonga.

Bir saf yo'lni o'ngga burdi,  
Boshqa yo'lga boqmadi.  
Bir saf esa chapga yurdi,  
O'ng ularga yoqmadi.

Men tanladim o'rta shoxni,  
Eng to'g'ri yo'l menga shul.  
Ergashtirib ming hamrohni,  
Tik osmonga soldim yo'l.

Alhol qanot qoqdi darg'a,  
G'azab bilan bong urdi.  
O'ng-u so'ldan ketganlarga,  
Qayting, deya buyurdi.

So'ng dedi:  
Biz qumursqalar  
To'g'ri yo'ldan yuramiz.  
Kim shu yo'ldan yurmasa gar,  
Bitta qo'ymay qiramiz.

Burg'u chaldi bizning podshoh,  
Jangga kirdik barobar.  
Shundan daraxt bo'ldi janggoh,  
Mozor bo'ldi sarosar».

Diqqatimni tortdi shu payt  
Qanotli shoh qumursqa.  
Uchib-qo'nib, u paydar-pay  
Chorlar edi urushga.

Qarab turdim bir nafas tek,  
So‘zi qiziq ko‘rindi,  
Yaqin borsam,  
Temuchindek  
Ko‘zi qisiq ko‘rindi.

Uzoq-yaqin tarixlarga  
Meni xayol uchirdi.  
Ko‘p dahshatni mitti darg‘a  
Xotiramga tushirdi.

Chidolmadim.  
Chertki solib  
Yo‘qotdim bu badbaxtni.  
So‘ng  
Supurgi, ohak olib  
Oqlab qo‘ydim daraxtni.

## TUSH

*(hazil)*

Kecha koʻrdim dahshatli bir tush,  
Kelolmayman oʻzinga hamon.  
Bir yozuvchi roman yozarmish,  
Men emishman unga qahramon.

Yozar emish meni xayolan  
Yoʻq xislatlar qoʻshib borimga.  
Hisoblashmas hech mantiq bilan,  
Sira boqmas ixtiyoringa.

U ne desa, toʻtiqush monand  
Men ham tilga jo qilarmishman.  
Jarliklardan sakrab bepisand,  
Tekis yoʻlda qoqilarmishman.

Nasib boʻlmay mahbub visoli,  
Chekmoq kerak chogʻi nolalar.  
Nutq soʻzlayman yorga, misoli,  
Gazetdagi bosh maqolalar.

Oʻzim hayron oʻz qilmishimga,  
Oʻzim bilmam, nedir matlabim.  
Hozir qilib turgan ishimga  
Toʻgʻri kelmas hozirgi gapim.

Laʼnatlayman qaro iqbolim,  
Chidolmayman yurak dogʻiga,  
Bora-bora aylanib qoldim  
Bozingarning qoʻgʻirchogʻiga.

Bu kunimdan o'lganim afzal,  
Deya qo'lga oldim-u pichoq...  
Xudo o'zi asradi bu gal,  
Bir seskanib uyg'ondim shu choq.

Boqdim, shukur, qo'l-oyog'im sog',  
Shukur, tirik odamman o'zim.  
Bir romanni o'qib banogoh  
Ilinibdi salgina ko'zim.

## BIR TAVAKKALCHI DEYDIKI...

Menga na sud-u savdo,  
Bor, nima bo'lsa bo'lsin,  
Mendan qoluvchi dunyo,  
Bor, nima bo'lsa bo'lsin.

G'am qilmoq odatim yo'q,  
O'ylashga toqatim yo'q,  
Mendan so'rang tarallo,  
Bor, nima bo'lsa bo'lsin.

Mendan ketarmi ketsa,  
Menga kelarmi kelsa,  
Kuydirma jonni aslo,  
Bor, nima bo'lsa bo'lsin.

Ko'nglim saxoga moyil,  
Hotamligimga qoyil,  
Chekdim tavakkal imzo,  
Bor, nima bo'lsa bo'lsin.

Sarmast erur xayolim,  
Ham faylasufman, olim,  
Bir g'oya menda tanho:  
«Bor, nima bo'lsa bo'lsin».

1982



## BO'RI CHAQIRGAN MAJLIS VA BEODOB OT HAQIDA LATIFA

Bo'rining qorni to'ydi,  
Go'sht ham tegdi joniga.  
Echki, quyon, ot, qo'yni  
Chaqirdi u yoniga.

Dedi: hozir to'q paytim,  
Foydalanib qolinglar.  
Menga dashnomlar aytib,  
Tanqid qilib olinglar.

Qani, boshla, quyonboy,  
Bir eshitay so'zingni.  
Botirsan-ku, biyronboy,  
Ko'rsatib qo'y o'zingni.

O'rtaqa chiqdi quyon,  
Avaylab o'z jonini.  
O'ltirar bo'ri polvon  
Qashlagancha qornini.

Quyon dedi: «Ming rahmat,  
Menda hech shikoyat yo'q.  
Sizdek oliy marhamat  
Sohibi inoyat yo'q.

Men qulingiz na derdim,  
Sizga fidodir jonim...»  
Bo'ri xursand hayqirdi:  
– Barakalla, Quyonim.

Buncha shirinsan, oqil,  
Chidash qiyin, ne deyman.  
Hozir to‘qman, tongda kel,  
Nahorga seni yeyman.

Quyon ketdi bosh egib,  
Mung‘aygancha dilxasta.  
So‘ng qo‘yga navbat tegib  
Minbarga chiqdi asta.

Dedi: Hech vaqt hech bo‘ri  
Bizdan hol so‘rgan emas.  
Minbar berib, joy to‘rin  
Munosib ko‘rgan emas.

Bu obro‘, bu hurmatdan  
Men terimga sig‘madim.  
Bunday zo‘r marhamatdan  
Ta’sirlanib yig‘ladim.

Bizlar mo‘min, ma’qul el,  
Rahm et, o‘zga ne deyman.  
Bo‘ri dedi: indin kel,  
Seni tushlikka yeyman.

Qo‘y ko‘z yosh to‘kdi ba’rab,  
Isyon qilmadi lekin.  
Ketarkan ma’yus qarab,  
«Rahmat» deb qo‘ydi sekin.

U ketgach keldi navbat  
Uzunsoqol echkiga.  
Unga tegdi taklif xat  
Payshanba kun kechkiga.

Nihoyat oxirgi gap  
Navbati otga yetdi,  
U bo‘rini mo‘ljallab  
Jag‘iga chunon tepdi.

Olov sachrab ko‘zidin  
Bo‘rida jon qolmadi.  
Ketganicha o‘zidan  
Qaytib tura olmadi.

Hamon unutmas otning  
Bu ishin va der har vaqt:  
– Mendek demokratning  
Padariga ming la’nat!

Bema’ni majlisga men  
Ikki dunyo qaytmayman.  
Ot – beodob, ot o‘lsin,  
Ziyofatga aytmayman.

Lekin unga tan berib,  
Ichida «qoyil» dedi.  
Quyon, echki va qo‘yni  
Aytgan vaqtida yedi.

1989

## RAIS VA SHOIR

Pillakor raisning da'vati ila  
Shoir mehmon bo'lgach qishloqqa kelib  
Madh yozdi yuksak she'r san'ati ila  
Pillani tillaga qofiya qilib.

Yil ham o'tgani yo'q, mehmondo'st rais  
Chorvador kolxozga o'tganin bilib  
U qasida yozdi qalbi to'la his  
Tuyani biyaga qofiya qilib.

Rais ishdan ketdi, u endi sobiq,  
Shoir xabar olmas nazarga ilib.  
Endi u she'r yozar uslubga sodiq  
Raisni dayusga qofiya qilib.

1989

## SHUM BOLA

Shundoq dedi, qulluq qilib,  
Gapni qo'yib joyiga  
Yangi zamon Shum bolasi  
Yangi zamon Boyiga:

«Qoshingizga yana keldim,  
Quloq soling, Boy ota,  
Sidqi dildan xizmat qilay,  
Ishga oling, Boy ota.

Fazilatim ko'pdir, yana  
Aybimni ham aytganman.  
Lekin endi yangi zamon,  
Men yolg'ondan qaytganman.

Chunki endi yolg'onni hech  
Aybgina deb bo'lmaydi.  
Aldaganni balo urmas,  
Aldangan ham o'lmaydi.

Shart emas Shum bola bo'lish,  
Yolg'on bukun osondir.  
Gazet to'la, kitob to'la,  
Majlis to'la yolg'ondir.

Bitta yig'in – Kotibiyat,  
Bitta yig'in – Rayosat.  
Yolg'on endi davlat ishi,  
Yolg'on endi Siyosat.

Innaykeyin demay turing,  
Quloq soling, Boy ota.  
Sidqi dildan xizmat etay,  
Ishga oling, Boy ota.

O'n kishilik mehnat qilib,  
Parcha nonga to'yaman,  
Bir aybim bor, faqat ba'zan...  
Rost gapirib qo'yaman».

Boy otaning jahli chiqdi,  
Dedi, ko'nglim zormidi?  
Yolg'oningga chidab edim,  
Rost gaping ham bormidi?

Yo'qol, seni ishga olsam  
Xonavayron bo'laman.  
Yolg'oningdan omon qoldim,  
Rost gapingdan o'laman!

G'azab bilan hassasini  
Qo'lga oldi Boy ota.  
Yangi zamon Shum bolasin  
Quvib soldi Boy ota.

1991

## YUBILEY

Rais so‘z beradi,  
Parvoyi palak.  
Minbarga boraman,  
Gursillab yurak.  
Sizning sha’ningizga  
So‘z aytnoq kerak.  
To‘rda o‘ltiribsiz  
Siz kerib ko‘krak.  
Umringiz ulug‘lik –  
Yoshiga yetib.  
O‘lmagan qul borki,  
Yosh to‘yi qilar,  
Kimligin bilmagan  
O‘shanda bilar.  
Yayraydi xususan  
Sizning kabilar.  
Men endi ne deyin,  
O‘rtoq yubilyar?  
Turibman hay’atning  
Qoshiga yetib.  
Hamisha yor bo‘ldi  
Sizga farog‘at,  
O‘zni o‘yladingiz  
Dunyoda faqat,  
Hech kimga yetmadi  
Sizdan manfaat,  
Bir shogird o‘stirmay,  
Eshitmay rahmat  
Keldingiz yubiley  
Oshiga yetib.  
Martaba, shon shuhrat,  
Mol davlat uchun

Jon fido etmoqni  
Bildingiz qonun.  
Hirs ila nafs bo'ldi  
Sizga rahnamun,  
Muborak bu yoshga  
yetdingiz bukun  
Qancha pok insonlar  
Boshiga yetib.  
Hali ko'p yubiley  
Ko'rarsiz, durust.  
Yuzingizdan ketmas  
Hali qizil tus.  
Sizdan ko'p «karomat»  
Ko'radi ulus,  
Lekin «Yaxshi edi»,  
Deydi el, afsus,  
Borsangiz qabrning  
Toshiga yetib.  
Bilmay tavfiq nedir,  
Nedir kamolot,  
Umr kamoliga  
Yetdi bir hayot.  
Sizdek yashamasin  
Olamda hech zot,  
Mendek nutq aytmasin  
Hech kimsa, hayhot,  
Kasbdoshi yubiley –  
Yoshiga yetib.

1979



## MAJLIS QILING

Vaqtingiz bo'sh bo'lsa ham,  
Bo'sh bo'lmasa, majlis qiling,  
Ko'nglingiz xush bo'lsa ham,  
Xush bo'lmasa, majlis qiling,  
Ovchilar, siz otgani  
Qush bo'lmasa, majlis qiling,  
Ahli bozor, sotgani  
Go'sht bo'lmasa, majlis qiling,  
Hech hisobmas, har kuni  
Qo'sh bo'lmasa – majlis qiling.  
Siz biror majlissiz o'tgan  
Kunni kun deb aytmangiz,  
Torting-u homuza,  
Ma'ruza uzun deb aytmangiz,  
Hamma takror etsa bir gapni,  
Nechun, deb aytmangiz,  
Ko'kka vovaylo qilib,  
Garduni dun deb aytmangiz,  
Dod demakka sizda  
Tovush bo'lmasa, majlis qiling.  
Siz ham, ey taftishchilar,  
Majlis sanog'in tekshiring,  
Hamqaror, kun tartib-u  
Hujjat varog'in tekshiring.  
Notiq og'zin tekshiring,  
Some qulog'in tekshiring,  
Kursi teshgan nozik ul  
Joyda qadog'in tekshiring,  
Gar jarohat unda  
Qo'sh-qo'sh bo'lmasa, majlis qiling.  
Ko'rmasin dehqon dala,  
Sozanda soz, shoir qalam,

Ishchi ham dastgoh yoniga  
Qo‘ymasin aslo qadam,  
Ochmasin olim kitob-u  
Qilmasin tajriba ham,  
Kimki gap bilmas, bilar ish,  
Qilsin o‘lguncha alam,  
Ish bilarni urgani  
Musht bo‘lmasa, majlis qiling.  
Gar mabodo majlisingiz  
Ertaroq bo‘lsa tamom,  
Sizga lozimdir yig‘inni  
Uyda ettirmoq davom.  
Xonaga minbar yasang-u  
Yuksaling oliymaqom,  
Masala qo‘ymoqqa uyda  
Bir sabab bo‘lgay mudom.  
Gaz qozon yo vanna, yo –  
Dush bo‘lmasa, majlis qiling.  
Belni bog‘lang, bu jahonni  
To‘ldiring qog‘oz bilan.  
O‘zni aldang, bo‘lmaganni  
Bo‘ldiring qog‘oz bilan.  
Ish bilan shod etmangiz hech,  
Kuldiring qog‘oz bilan.  
Kim qog‘ozbozlikni suymas,  
O‘ldiring qog‘oz bilan.  
O‘lmasa u yoki  
Behush bo‘lmasa, majlis, qiling.  
Siz agar topqir esangiz,  
Nafaqat sohib suxan –  
Demangiz majlisni majlis,  
Ot qo‘ying turli-tuman.  
Gohi suhbat, gohi hay’at,  
Davra deng, yo anjuman,

Lahzalik deng, haftalik deng,  
Ne desangiz jon-u tan,  
Nomi ming bo'lgach,  
Faromush bo'lmasa, majlis qiling.  
Vaqt o'tar, soat o'tar  
Kun oy bo'lur, oy yil bo'lur.  
Kim-u o'tgan umriga  
Qarsak chalur, qoyil bo'lur?!  
Fursat eng oliy hakamdur,  
Doimo odil bo'lur,  
Barcha bir kun ul hakamning  
Hukmiga doxil bo'lur,  
To'plangiz es-hushni,  
Es-hush bo'lmasa, majlis qiling.

1982

\*\*\*

Do'stlarimni hayron qoldirar  
Ba'zan ishqiy she'rlar yozganim.  
Hazilkashlar qo'ymasdan so'rar:  
– Kuylaganing qaysi nozanin?

Yo'q dey desam, kulgi bo'laman,  
Aldamoqni hech ko'rmayman ep.  
Ne ham derdim, hazil qilaman,  
Shoir hali izlanishda, deb...

1957

## SHE'R HAQIDA SHE'R

*(hazil)*

She'rim, mana, bitding nihoyat,  
Tunim uyg'oq o'tdi qoshingda.  
Bitding dedim, sevinma faqat,  
Qancha ish bor hali boshingda.  
Hali seni yo'nib, tarashlab  
Yuz martalab o'chirmog'im bor.  
Qayta-qayta g'ijimlab tashlab,  
Takror-takror ko'chirmog'im bor.  
Axir bir kun mavsuming yetib,  
Kirganida g'o'za shonaga,  
Asta sening qo'lingdan tutib  
yetaklayman gazetxonaga.  
Ilhom dilga bog'lagan qanot,  
Shaxdam-shaxdam tashlaymiz odim,  
Bizga aylab «shirin» iltifot,  
Qarshi olar adabiy xodim.  
Seni asta yonimdan olib,  
Hayajon-la tutaman unga.  
She'rmi? – deya u qovoq solib  
Ko'zoynagin qo'yar burunga.  
O'qib chiqar, tortmaga tashlar,  
O'z ishini ettirar davom.  
Endi, she'rim, shu kundan boshlab,  
Sen meniki emassan tamom.  
Hech kim seni she'r demas endi,  
Hech kim demas qo'shiq yo g'azal.  
Sen kuy, ilhom, shavq emas endi,  
Bunda sening noming «material».  
Urinmagin endi behuda,  
Uchmoq uchun bog'lama qanot.

Orom olib shirin uyquda  
Muharrirning tortmasida yot.  
Yoz haqida bitilgan bo'lsang,  
Shoshma, hali qish kelguncha tur.  
Baxting kulib, yil o'tgach, arang  
Yarming chiqsa, shunga ham shukur.  
Hali seni, she'rim, necha bor  
G'urbatlarga yetaklar taqdir.  
Bunda qancha... muxlislaring bor,  
Hali seni qilurlar tahrir.  
O'zgaradi qancha kaloming,  
O'zgaradi qanchalar lavhang.  
Yozilganda «Tong» bo'lsa noming,  
«Oqshom» bo'lar balki sarlavhang.  
So'ng olamga yoygali qanot,  
Elni o'zga qilgali «shaydo»  
Quyosh yanglig' bir kuni – hayhot! –  
Gazetada bo'lursan paydo.  
O'z nomimdan taniyman arang,  
Lol turaman sening qoshingda.  
Navbat bilan tanqidchi akang  
Yong'oq chaqar endi boshingda.  
Tahlil aylab ters-u o'ngingdan,  
Ikkimizni qiladi behol.  
Xo'p do'pposlab, tanqid so'ngida  
Ijodimga tilaydi kamol.

1961

## NASIHAT

*(«Kulgu mushoiralari»dan)*

Qoʻlni ishga mohir etma,  
Tilni gapga usta qil,  
Ishni bir qilgan joyingda  
Gapni albat yuzta qil.  
Boshligʻing oldida topmoq  
Istasang sen eʼtibor,  
Qomating yuz turli bukkin,  
Soʻzni ham ming tusda qil.  
Jilmayib tur yonida, hech  
Ochma tanqidga ogʻiz,  
Taklifing boʻlsa oʻziga  
Asta-yu ohista qil.  
Tur desa tur, yot desa yot,  
Chiqma zinhor izmidan.  
Hech fikr qilma oʻzingcha,  
Qilma bir ish mustaqil.  
Boshligʻing koʻnglini bil sen,  
Ketma pinjidan nari,  
Paytini topsang mabodo,  
Birga yuzta-yuzta qil.  
Bil, senga bu besh nasihat,  
Eng asosiy qoida:  
Qoʻlni ishga mohir etma,  
Tilni gapga usta qil.

1968

## SOCH MADHI

*(«Kulgu mushoiralari»dan)*

Bir zamonlar faxr etarding  
Qop-qora soching bilan,  
Sen bukun qoshimdadursan  
Turfa qirmoching bilan.  
Uchramas bundoq g‘aroyib  
Partav afshon bosh sira,  
Kez Iroq birlan Ajamni,  
Rumni Chinmochin bilan.  
Maslahat, senga bukundan  
Bir aso darkor ekan,  
Kulsa yoshlar to‘planib,  
Quvgaysan og‘oching bilan.  
Yo‘qsa, o‘tganda yalang bosh  
Ko‘cha-yu bozordan,  
Hammani bezor qilursan  
«Po‘shu» «qoch-qoch»ing bilan...  
Do‘stginam, boshingni tik tut,  
Arzigay faxr aylasang,  
Bu kabi oppoq ochilgan  
Guli qiyg‘oching bilan.

1968



## KO'CHAMEN

*(«Kulgu mushoiralari»dan)*

Har ko'cha obod, hamon men  
Turfa vayron ko'chamen.  
Yozda changiston-u qishda  
Balchig'iston ko'chamen.  
Ko'chamen der bo'lsam, e-voh,  
Ko'plar aylar ishtiboh,  
Bilmadim, rost ko'chadurmen,  
Yoki yolg'on ko'chamen.  
Qanchalarning ko'zlariga  
Chang-g'uborim to'ldirib,  
Qanchalarning etigini  
Tortib olg'on ko'chamen.  
Bir tomonim u tumandur,  
Bir tomonim bu tuman,  
Boshlig'im ko'p, ko'p arosat –  
Ichra qolg'on ko'chamen.  
Ayladi jarrohi gorgaz,  
Vohki, ko'ksim chok-chok,  
Kim qachon tikkay bu zahmim,  
Mangu hayron ko'chamen.  
Ikki boshliqdin men endi  
Kimga faryod aylayin?  
Yo u tomon ko'chgum endi,  
Yo bu tomon ko'chamen.

1968

## BOSHINDADIR

*(«Kulgi mushoiralari»dan)*

O'n sakkiz ming olam oshubi  
Padar boshindadir,  
Ne ajab, chun o'g'li oning  
O'n sakkiz yoshindadir.  
Nay misol shim kiygan ul  
Sandiqdayin tufli bilan,  
Hurpayib turgan savatdek  
Soch aning boshindadir.  
Ul padar oh urmasin –  
Nechun yoqosin chok etib,  
Neki bad fe'l bo'lsa, bari  
Ushbu beboshindadir.  
O'zgalardan kulgay erdi  
Ko'cha-ko'yda bir zamon,  
Aqlg'a yuz hayrat, emdi –  
Bul uning qoshindadir.  
O'g'lidan aylardi umid  
Keltirar rahmat debon,  
Barcha «rahmat» elning otgan  
Ta'nai toshindadir.  
Yo'q ajab, yoshlikda o'g'lin  
Ota ardoqlab, suyib,  
Erkalab boshiga qo'ydi,  
Ul hamon boshindadir.

1968

## SHAHAR IJROKOMINING RAISIGA OSHIQLARDAN ARIZA

*«...26 aprelda Toshkent «Baxt uyi»da 25 ta  
nikoh qayd etilgan...»*

O'rtoq rais,  
Ishingiz ko'p,  
Vaqtiniz kam, bilamiz.  
Ammo, uzr, uch-to'rt minut  
Fursatingiz olamiz.  
Qo'ying bir dam qog'ozlarni,  
Dunyo ishi bitganmas.  
Ko'zoynakni olib qo'yib,  
Quloq bering bir nafas.  
Biz oshiqlar, ya'ni biz ham  
Shu shaharga grajdan.  
Arizaga haqqimiz bor  
El qatori shu vajdan.  
Qanday bo'lsa yangi shahar –  
Bizga emas baribir.  
Oshiq xalqi tarqoq xalq-u,  
Lekin gapi, dardi bir.  
O'rtoq rais, ishq ahlini  
Qo'shsangiz gar qatorga,  
Taklifimiz eshiting-u  
Tirkab qo'ying qarorga.  
Avvalo shu –  
Bizlar ko'pmiz,  
Bizlar yuz ming nafarcha.  
Shahar ichra qurib bering  
Bizlar uchun shaharcha.  
Bu shaharga nom qo'yilsa –  
«Sevgi shahri» atalsin.

Darvozasi tepasiga  
Katta shior qadalsin.  
Bu shiorga katta qilib,  
Hamma uchun ko'rsatib,  
Zo'r shoirga buyurtirib  
She'r yozilsin to'rt satr.  
Mazmuni shu:  
Bu shaharcha  
Barcha uchun keng ochiq,  
Kim bo'lmasin yuragidan,  
Faqat bo'lsin chin oshiq.  
Ammo zinhor bu shaharga  
Kiritilmas bedardlar.  
Sevgi yugin ko'tarolmay  
Bir bor qochgan nomardlar.  
Chin muhabbat, chin dard bo'lsin  
Bu shaharcha ahlida.  
Shaharchaning aylanasi  
Bo'lsin yurak shaklida.  
Sadoqatga makon bo'lsin,  
Timsol bo'lsin umrbod.  
Eng markaziy ko'chasiga  
«Vafo» deya qo'ying ot.  
Bitta ko'cha «O'pich» bo'lsin,  
Bitta maydon  
«Ahd-paymon».  
Bu ko'chaga kirmaganlar  
Mangu qilsin pushaymon.  
Bir xiyobon «Visol» bo'lsin,  
Hech bo'lmasin firog'i.  
Xira bo'lsin, ko'kish bo'lsin  
Bu xiyobon chirog'i.  
Bitta ko'cha bu shaharda  
«Izhori ishq» atalsin.

Tajribasiz yosh oshiqlar  
Dardin bunda aytolsin.  
«Sevaman» deb yozib qo‘ying  
Bu ko‘chaning boshiga.  
Aytolmagan to‘xtab tursin  
Shu yozuvning qoshida.  
Katta ravon shahroh nomin  
«Pokizalik» deb qo‘ying.  
Oq marmardan lavha qo‘yib,  
Navoiydan bayt o‘ying.  
Bu shaharga mangu qilib,  
O‘chmas qilib zarhali  
O‘rnatilsin Farhodlarning,  
Majnunlarning haykali.  
«Vafo» nomli ko‘cha uzra  
Tursin ahli chin vafo,  
Romeo va Tohir bo‘lsin,  
Djuletta va Zuhro.  
«May va mahbub» ko‘chasining  
Kiraverish yo‘lida  
Tursin shoir Umar Xayyom,  
May kosasi qo‘lida.  
«Sargashtalik» ko‘chasining  
«Rashk» tupigi ustida  
Otelloning shakli tursin  
Qora kiyib ustiga.  
Bu ko‘chaning oxirida  
Bo‘lsin «Makr» maydoni.  
Tasvir eting bunda g‘olib  
Yosuman va Yagoni.  
«Gumon» va «G‘ash» ko‘chasiga  
Belgi qo‘ying kattakon.  
Bu ko‘chaga kirishmasin  
Yosh oshiqlar hech qachon.

Qorovullar qo‘ying, haydang,  
Intilsa deng «nari bor!»  
Ayting, ko‘cha oxirida  
«Ayriliq»ning jari bor.  
Shaharchada o‘ssin faqat  
Sarv-u gulu sunbullar...  
Gul shoxida erta-yu kech  
Sayrab tursin bulbullar.  
Tovuslar tinch xirom etsin  
Berib o‘zga orolar...  
Bu shaharga ko‘chirilsin  
Barcha ZAGS byurolar.  
Uylanganlar bu shaharga  
Kelib tursin gohida.  
Orom olib o‘tirishsin  
Bir dam «Yarash» bog‘ida.  
Mayli, qisqa qilamiz. Biz  
sizdan uy so‘ramaymiz,  
Bizlar shunday, turfamiz,  
Boshpanamiz moviy osmon,  
Yulduzlardir ko‘rpamiz.  
Boshpanamas, bizga faqat  
Pana kerak tuzukroq.  
Shahar yorug‘ kecha-kunduz,  
Dala esa ko‘p yiroq.  
Yo‘q, hazilga yo‘ymang buni,  
Gaplarimiz bari chin.  
Biz bilmasak, kim biladi  
Shaharning har qarichin.  
Ha deng, yo yo‘q, ketmas bunda  
«Ammo», «yoxud», «magar»i,  
Bizga qolsa butun Toshkent  
Bo‘lsin «Sevgi shahari».  
Xulosa shu – iltimosni

Bajarsangiz xo‘pu xo‘p,  
Yo‘q desangiz, yuqoriga  
Yozajakmiz bizlar ko‘p.  
Hayron bo‘lmang, ustingizdan  
Arz qiluvchi joyimiz –  
Na Sovmin, na Oliy Sovet,  
Balki kelin oyimiz.  
Axir siz ham sevishgansiz...  
Xo‘p desangiz ajabmas,  
Kelin oyim ikki og‘iz  
«Qurib bering» desa bas.  
Xayr endi, qaror kutib  
Yuragimiz oshiqar.  
Salom bilan shahringizda  
Yashaguvchi oshiqlar.

## QORXAT

### *Shoira qizlarga*

Qor yog‘ar – osmonda oqqushlar uchar,  
Qor yog‘ar – osmondan oq ukpar tushar.  
Qor yog‘ar yer-u falakni to‘ldirib,  
Bizlar ersak issiq uyda o‘ltirib,  
Tark etolmay xalqimizning odatin  
Yozamiz do‘stlarga do‘stlik qorxatin.  
Qorxat asli qorday oppoq dil xati,  
Oq ko‘ngilning mehri, tafti, hurmati.  
Oshinolik, chin vafo izhori ul,  
Gohi pinhon sevgining iqrori ul.  
Qor yog‘ar, qorxat ila, xullas kalom,  
Shoira qizlarga yo‘llaymiz salom.  
Sizga, ey Gulchehra qizlar, E’tibor,  
Aytamiz ko‘ngilda orzu neki bor.  
Oy Halima ham Malika, Tursunoy,  
Ey chiroy-u fayzga boy-u she’ri soy,  
Sizga dildan eng samimiy ehtirom,  
Yangi yilning tabrigi ham assalom!  
Endi kelsak so‘zning indallosiga,  
Ya’ni qorxatning asl ma’nosiga:  
Yangi yilda davra tuzmoq farz bo‘lur,  
Kim yutilsa, bir ziyofat qarz bo‘lur.  
Qorxat eltgan elchimizni tutsangiz,  
Tan berurmiz, qarz bo‘lurmiz, yutsangiz.  
Yo‘qsa o‘zni katta ishga chog‘langiz,  
Shu bugundan pesh etakni bog‘langiz.  
Bermangiz Gulchehralarga zarra dam,  
Biryo‘la yuvgay mukofotlarni ham.  
Yeng shimarsin Mo‘tabar, Oydin bukun,  
Qarz ular bulturgi dostonlar uchun.  
Tutdi bir qo‘lda gazet, bir qo‘lda tor,



«Lirika»ni yuvradi lek E'tibor.  
Bibisora ham Sanobar qaydadir,  
Bitta she'ri bir ziyofatga tatir.  
Xullas, endi barchangiz hamdam bo'ling,  
Xudsi «Qizlar davrasi»dek jam bo'ling.  
She'r yozar chog'idagidek yoningiz,  
Bunda dasturxoningiz – dostoningiz.  
O'zingiz aylang tovus yanglig' xirom,  
She'riyatday totli bo'lsin har taom.  
Ol yanog'ingiz kabi olma, anor,  
Ko'zlaringizdek charos boqsin xumor.  
Eslatib ham pistalar xandoningiz,  
Yuzingizdek kulsa shirmoy noningiz.  
Bo'lsa bodomlar qabog'ingiz kabi,  
Ham murabbolar dudog'ingiz kabi.  
Lag'mon eshib tola-tola sochingiz,  
Misli yoyib tashlaganday sochingiz.  
Sochdagi bargakdayin ko'k bodiring,  
Hamxino yanglig' patinjon oldiring.  
Tarvuz-u qovunni ham serob qiling,  
Xuddi oshiqlarni tilganday tiling.  
Har uzum bo'lsin dur-u marjon kabi,  
Yo Mukarram she'r o'qib turgan labi.  
Shabnamikimoy Nilufar xoliday,  
Ta'mi Oydin she'rlarining boliday.  
Tursa soz sizning g'azal yanglig' sharob,  
Kirs a boz bizning yurak yanglig' kabob.  
Ol anorni dilni ezganday ezing,  
Sharbatini mayni suzganday suzing,  
Barcha ne'mat bir tomon-u she'r soz,  
She'r birlan bizni aylang sarfarozi.  
O'ltirib oppoq sahardan toki shom  
Bo'lmasin hech bahs-u she'rxonlik tamom.  
Bu kabi suhbatga chin do'stlar aro

«Qilsa arzir yuz Saida jon fido».  
 Men bo'lay bir necha hamrohim bilan.  
 O'lmas-u Abdulla, Ibrohim bilan.  
 Borgumiz yutsak agar albatta biz,  
 Yo'qsa siz izzatda-yu xizmatda biz.  
 Shoyusuf obkashda tongdan suv tashir,  
 Ham Barot o'qlog' tutib yoygay xamir.  
 Chuchvara tukkay Muhammad cho'kkalab,  
 O't pudar Husniddin o'zdan o'pkalab.  
 Ne ajab, kuysa patir, yonsa qozon,  
 Tandir oldida Rauf, oshpaz – Omon.  
 «Hay» deb uf tortib Jamol yelpir kabob,  
 Topmayin chovlini Oxunjon xunob.  
 Shu mahalda bir latifa, shubhasiz,  
 To'lqin-u Anvarga so'ylaydur Aziz.  
 Oqibat mehmonxona qoq yer bo'lur,  
 Katta dasturxonda yolg'iz she'r bo'lur.  
 Bir tomonda siz pari ruxsoralar,  
 Bir tomonda biz g'arib bechoralar.  
 Kim qoshin kuydirgan-u do'ppini kim,  
 Bosh egarmiz, yolvorarmiz sizga jim...  
 Xat yozildi, endi biz omad talab,  
 Elchining chaqqonligida hamma gap.  
 Yo'llasak Ma'ruf Jalilni – ancha bo'sh,  
 Yoki Sayyormi? U bo'lmas, laqqa go'sht...  
 Xo'sh, kim elchi? Ha, bilib ishning ko'zin,  
 Elchi qildik mulla «Mushtum»ning o'zin.  
 Ushlab olmoqning sira imkoni yo'q,  
 Chunki u ketguvchi yer poyoni yo'q...  
 Qor yog'ar – osmonda oqqushlar uchar,  
 Qor yog'ar – osmondan oq ukpar tushar.  
 Qor yog'ar, qorxat ila xullas kalom,  
 Barcha oy qizlarga yo'llaymiz salom.

1973

## BIZLAR ISHLAYAPMIZ

– Gaping bo‘lsa,  
Mendan to‘g‘richa so‘ra,  
Mikrofoningni qo‘y, muxbir ukajon!  
Men uchun temirga so‘zlashdan ko‘ra,  
Ertadan kechgacha yer chopgan oson.  
Bizning ishimizni «saxovat» deding,  
«Dala polvonlari» atading bizni.  
Buncha balandparvoz so‘zlamas eding,  
Bilsayding ko‘nglimiz, odatimizni.  
Bizga to‘g‘ri kelmas «chavandoz» so‘zi,  
«Jonbozlar» deganing erishroq bir oz.  
«Zafar marrasini quchmoq» ne, o‘zi?  
Bizlar ishlayapmiz,  
Bu – mehnat, xolos.  
To‘g‘ri,  
Biz ko‘plardan erta turamiz,  
Boshqalardan ko‘ra yotamiz kechroq.  
Yoz-u qish dalada «javlon uramiz» –  
Sening so‘zing bilan aytganda –  
Biroq,  
Paxtakor kasbining shox-butog‘i yo‘q,  
Faqat mehnatimiz sal o‘ziga xos.  
Qo‘l qadog‘i bor-u, ish adog‘i yo‘q.  
Bizlar ishlayapmiz,  
Bu – mehnat, xolos.  
Kasbning o‘ng‘ayi yo‘q,  
Ishning osoni,  
Bayt bor:  
Mashaqqatsiz bo‘lmaydi hunar.  
Kimning shirin bo‘lsa agarda joni,  
Har bir kasb ko‘ziga mushkul ko‘rinar.  
Tiriklik deganning o‘zi bo‘lmaydi,

Rizq osmondan tushmas chekib yotsang nos.  
Ozroq jon koyitsa, odam o'lmaydi,  
Bizlar ishlayapmiz,  
Bu – mehnat, xolos.  
«Bobodehqon» emas,  
Biz oddiy dehqon,  
Shuning uchun gapning to'g'risi ma'qul.  
«Paxta ishq» deding,  
Bu ishqmas, ishon,  
Paxta jononamas, gul ham emas ul.  
U peshona teri,  
Mashaqqat,  
Ozor,  
Yelkadagi yuk u – bizlarga meros.  
Asalari uchun «balli» na darkor? –  
Bizlar ishlayapmiz,  
Bu – mehnat, xolos.  
Dala xayolingda balki sof havo,  
Faqat tiniq suvdir,  
Ko'm-ko'k maysa o't.  
Yo'q,  
Bunda  
Texnika, ilm bor,  
Kimyo,  
Paxtazor ham bugun kattakon zavod.  
Biz ham,  
O'ylab ko'rsa,  
Rabochiy odam,  
Yengil moy,  
Ko'ngilda motorga ixlos,  
Lekin biz xursandmiz shunisiga ham,  
Bizlar ishlayapmiz,  
Bu – mehnat, xolos.  
Fan-ku, o'z yo'liga,

Paxtaga tuyg‘u,  
Ilmi g‘ayb degandek,  
Sezgi ham kerak.  
Bir kun erta eksang, erta bo‘lar-u,  
Bir kun kech qadasang,  
Kech qolding, demak.  
Temirchidan emas, dehqondan chiqqan  
Bu maqol:  
Temirni qizig‘ida bos.  
Ko‘zimiz o‘rgangan,  
Yurak chiniqqan,  
Bizlar ishlayapmiz,  
Bu – mehnat, xolos.  
«Chopiq gashti» deding,  
Eh, bu ne rohat,  
Bilmoq bo‘lsang, sezmoq bo‘lsang, ne huzur,  
Kun bo‘yi demayman,  
bir-ikki soat  
Lolaqizg‘aldoqning oftobida tur.  
Bu ish  
«Po‘lat otni mag‘rur surish»mas,  
Rost gapni aytaver,  
Uyaltirmas rost.  
Dalada chang yutish «javlon urish»mas,  
Bizlar ishlayapmiz,  
Bu – mehnat, xolos.  
Gazetda she‘ringni o‘qidim u kun,  
Suvchi to‘g‘risida bitibsan «ash‘or».  
Tasvirlabsan:  
Suvchi oppoq-oydin tun  
Suv bo‘yida yorin  
kutar intizor.  
Bir kecha ko‘rsayding suvchi zahmatin,  
Oyni handalakka qilmasding qiyos.

Tark etib sahargi uyqu lazzatin,  
Bizlar ishlayapmiz,  
Bu – mehnat, xolos.  
«Ulkan majburiyat»,  
«Ahd-u paymonlar» –  
Dehqon so‘zimas, –  
Biz ko‘krak kermaymiz,  
Hisob-kitoblidir bizning planlar,  
Ko‘zimiz yetmasa, va’da bermaymiz.  
Har bir rejamizda  
Tajriba,  
Hayot,  
Har so‘zimizda bor bir ilmiy asos.  
Qilmoqda emasmiz  
«Afsona bunyod»,  
Bizlar ishlayapmiz,  
Bu – mehnat, xolos.  
Chigitning navi-yu  
Tuproq kuchidan  
Tog‘ning qorigacha hisobda,  
Biroq  
Tabiatda ish ko‘p bizlar kutmagan,  
Paxtaning do‘stidan dushmani ko‘proq.  
Qurt tushsa,  
Qo‘l bilan teramiz ba’zan,  
Qaytadan ekamiz  
Do‘l ursa paqqos.  
Talashib, kelishib  
Tabiat bilan,  
Bizlar ishlayapmiz,  
Bu – mehnat, xolos.  
Ba’zan yanglishamiz,  
Biz ham insonmiz,  
Xato – tonnalarni nobud etadi.

Majlisdagi gaplar, misoli bigiz,  
Suyak-suyaklardan o‘tib ketadi.  
Chidaymiz.  
Otadan qolgan mol emas,  
O‘z mulkimiz uchun  
Barcha ehtiros.  
Gap bor:  
Ot tepkisin ot ko‘tarar, bas,  
Bizlar ishlayapmiz,  
Bu – mehnat, xolos.  
Terimni aytmayman,  
Ortiqchadir gap,  
Kuzda kelsang, o‘zing ko‘rasan, ukam.  
Raislar uyiga bormas haftalab,  
Yigirma to‘rt soat  
Sekretarga kam.  
Terim ham mashaqqat,  
Ham quvonch,  
Tashvish,  
Paxta doim birdek  
Ochilmas qiyg‘os.  
Bari bir,  
Terim ham o‘zimizning ish,  
Bizlar ishlayapmiz,  
Bu – mehnat, xolos.  
Har bir mashaqqatning  
Rohati ham bor,  
Har ko‘shish bir quvonch  
Hadya etadi.  
Ko‘pkarida otni qamchilab bir bor  
«Hayt» desang, g‘uboring chiqib ketadi.  
Turmushimiz ko‘rib turibsan, mana,  
Ketmas davlatimiz – fe’limizga mos.  
Bunga bois,

Takror aytaman yana:  
Bizlar ishlayapmiz,  
Bu – mehnat, xolos.  
Ha, biz ishlayapmiz,  
Chunki bu mehnat  
O‘zbek shuhratiga shuhrat qo‘shadi.  
Yurtning g‘aznasiga  
Bizning barakat  
Jaraq-jaraq oltin bo‘lib tushadi.  
Olamda bormi hech  
Bunaqa farah!  
Lekin yashayapmiz beay-yu-hannos.  
Hayot – jannat emas,  
Ish – emas do‘zax,  
Bizlar ishlayapmiz,  
Bu – mehnat, xolos.  
Kamimiz yo‘q,  
Uyga kelganda mehmon,  
Bitta qo‘y so‘yishga yetar qurbimiz.  
Faqat tilagimiz – el bo‘lsin omon,  
Omon bo‘lsin doim  
Ota yurtimiz.  
Senga aytadigan gapim shu,  
Ukam:  
Jimjima gapni qo‘y,  
To‘g‘risini yoz.  
Toki ko‘rsin,  
Bilsin,  
Anglasin olam,  
Bizlar ishlayapmiz,  
Bu – mehnat, xolos.

*1975-1976*



## TANGRI VA YAMOQCHI

Yamoqchi tangriga derkan tinmayin:  
– Ey xudo!  
Menga ham bir qayrilib boq!  
Chorig‘ing so‘kilsa, tikib berayin,  
Kavushing teshilsa,  
Solayin yamoq.  
Tangri debdi bir kun:  
– Ol boqiy umr,  
Farishta bo‘lursan!  
– Ey, qo‘y, kerakmas!  
Umr berma menga, ber ozroq ko‘mir,  
Ustiga bir chetan  
Yantoq bo‘lsa, bas.  
Tangri debdi:  
– Tun-kun sajdalar qilib  
Shungamidi chekkan nola-yu ohing?  
Nima qilar eding menga sig‘inib,  
Asli  
Aravakash ekan  
Ilohing.

1976

## **QALAMHAQI VA OYLIK**

– Shoir, nega ko‘nmasdan  
She’rdan kelgan boylikka,  
Erta-yu kech tinmasdan  
Ishlayapsan oylikka?  
– Chunki oylik hamxona  
Yordek sodiq oshnodir.  
Qalamhaqi – jonona  
Qizlardek bevafo dir.

*1977*

## TANDIR HAQIDA ERTAK

Mo'jaz hovli,  
Pastgina devol,  
Pastakkina tandiri bilan:  
Yashar edi kichkina bir chol  
Kichkina bir kampiri bilan.  
Yashardilar kamtar va halol,  
Osoyishta taqdiri bilan.  
Pichoq charxlar ermak uchun chol,  
Kampiri band xamiri bilan.  
Nafaqa bor,  
Chol-kampir mamnun,  
Daraxt ham bor – bir tup olucha.  
Lekin shu tor hovlidan bir kun  
O'tar bo'ldi kattakon ko'cha.  
Ular bu gap tarqagan kundan  
Mung'ayishib so'lib qoldilar.  
Bamisoli ini buzilgan  
Musichadek bo'lib qoldilar.  
O'z boshidan kechirgan bilar,  
O'ylab ko'ring, osonmas, axir,  
Shu hovlida turgan edilar  
Naq oltmish yil chol bilan kampir.  
Ular bunda ko'rdi go'shanga,  
Ikki o'g'il boqdilar o'ktam.  
Kuzatdilar ikkovin jangga,  
Qaytgani yo'q ammo biri ham.  
Mana,  
Uy ham buzilar endi,  
Tan berdilar yana taqdirga.  
Faqat ular o'rgangan edi  
Parcha yerga, pastak tandirga.  
Boshqarmaga qatnamadi chol,  
Raysovetga yurmadi kampir.

Peshonada borini alhol  
Yurt qatori ko‘rarmiz, axir.  
Ne qilardik,  
Ko‘pga kelgan to‘y,  
Nolish bizga yarashiq ishmas,  
Tegar axir bizga ham bir uy,  
Ko‘cha-ko‘yga haydab qo‘yishmas.  
Shunday bo‘ldi,  
Berdilar uy ham,  
Ko‘chirdilar ko‘rsatib hurmat.  
Biram yorug‘,  
Ozoda, shinam,  
Hammadan ham... birinchi qavat!  
Kampir cholni chimchilab kulsa,  
Xush keladi cholga qilig‘i.  
Bir jo‘mrakdan sovuq suv kelsa,  
Bir jo‘mrakdan kelar ilig‘i.  
Oppoq vanna,  
Gazxona... rohat,  
Hatto po‘choq tashlashga paqir...  
Hamma narsa joyida,  
Faqat...  
Faqat bunda yo‘q ekan tandir.  
Busiz ular bir kun turolmas,  
Tatimaydi bersa jahonni,  
Chol qurmag‘ur orziga olmas  
Gaz o‘choqda pishirgan nonni.  
Boshqarmaga arzga bordi chol,  
Raysovetga qatnadi kampir.  
«Qanday kechar tandirsiz ahvol,  
Uy kerakmas bizga betandir».  
Boshqarmada yelka qisdilar,  
Raysovetda bo‘ldilar hayron.  
Jilkontorda shartta kesdilar:  
«Yo‘q, bo‘lmaydi tandirga imkon».  
«Hech bir yerga qo‘ndirib bo‘lmas

Gap shu, – dedi JEKning rahbari. –  
Hamma ruxsat bersa ham, ko‘nmas  
O‘t uchirish tashkilotlari.  
Boshda hech kim qilmagan xayol,  
Proektga qo‘shmagan, axir...»  
Sabablarni tushunmadi chol,  
Dalillarga ko‘nmadi kampir.  
Ikkovin ham tegdi tishiga  
«Ammo», «Lekin», «Ha», «Albatta»lar.  
Xullas kalom, tandir ishiga  
Aralashdi oxir kattalar.  
Boshqarmada dedilar mumkin,  
JEKdagilar topdilar tadbir.  
Baland uyning yonida bir kun  
Chol-kampirga qurdilar tandir.  
Qo‘shnilar ham qarab turmadi,  
Kim g‘isht tergan,  
Kimdir qorgan loy...  
Tushmadi ham JEKning hurmati,  
Topildi ham tandirga mos joy.  
Tandir bitdi  
Va o‘sha-o‘sha  
Tong yorishar chog‘ida har kun  
Osmon bo‘yi tomlardan osha  
Ko‘kka o‘rlar ingichka tutun.  
O‘sha-o‘sha, bizga beshikdan  
Tanish xush bo‘y taralar har yon.  
Tongda har bir ochiq eshikdan  
Rizqdek kirar bir juft issiq non.  
Shunday yashar –  
Sokin, bezavol  
Pastakkina tandiri bilan  
Katta uyda kichkina bir chol  
Kichkina bir kampiri bilan.

1977

## **QARSAK HAQIDAGI SHE'RG JAVOB**

Men she'r yozsam,  
O'qisam uni,  
Tinglaganlar qarsak chalmasa.  
Biror kimsa biror so'zini  
Yodida ham saqlab qolmasa.  
Faqat bittagina bo'z o'g'lon  
Uyga qaytgach, yig'lasa to'lib.  
Yig'lab-yig'lab tong bo'zargan on  
Uyg'onsa u Alpomish bo'lib.

*1988*

## **QALIN PULI**

Qalin puli – uch ming. Ming – qizi  
Uchun,  
Yana ming – sandig'i, kigizi uchun.  
Xo'sh, yana ming nega? Har lahza senga  
Sanchib turadigan bigizi uchun.

*1988*

## MUNDARIJA

Matmusaning qishlogʻi .....	3
Matmusaning qalpogʻi .....	6
Matmusaning lagani .....	7
Matmusaning charxpalagi .....	8
Matmusaning tandiri .....	11
Matmusaning uylanishi .....	13
Qiziquvchan matmusa .....	15
Matmusa – rassom .....	17
Matmusaning dutori .....	20
Tandir kiygan matmusa .....	23
Matmusaning mehmondoʻstligi .....	25
Matmusaning qoʻshigʻi .....	27
Matmusa va oʻgʻrilar .....	31
Matmusaning amerika ochishi .....	33
Matmusaning haykali .....	37
Matmusaning eshak sotgani .....	43
Matmusaning bogʻi .....	46
Kelajakning matmusalari .....	48
Qumursqalar jangi .....	50
Tush .....	54
Bir tavakkalchi deydi .....	56
Boʻri chaqirgan majlis va beodob ot haqida latifa .....	57
Rais va shoir .....	60
Shum bola .....	61
Yubiley .....	63
Majlis qiling .....	65
Sheʼr haqida sheʼr .....	69
Nasihat .....	71
Soch madhi .....	72
Koʻchamen .....	73
Boshindadir .....	74
Shahar ijrokomining raisiga oshiqlardan ariza .....	75
Qorxat .....	80
Bizlar ishlayapmiz .....	83
Tangri va yamoqchi .....	89
Qalamhaqi va oylik .....	90
Tandir haqida ertak .....	91
Qarsak haqidagi sheʼrga javob .....	94
Qalin puli .....	94

*Adabiy-badiiy nashr*

**Erkin Vohidov**

# **QIZIQUVCHAN MATMUSA**

Muharrir	<i>Gulnoz Mo‘minova</i>
Badiiy muharrir	<i>Oloviddin Sobir o‘g‘li</i>
Texnik muharrir	<i>Dilmurod Jalilov</i>
Sahifalovchi	<i>Madina Abdullayeva</i>
Musahhih	<i>Rayxon Ibragimova</i>

Nashriyot litsenziyasi AI № 315. 24.11.2017.

2018-yil 15-martda bosishga ruxsat etildi.

Bichimi 84x108  $\frac{1}{32}$ . Times New Roman garniturası.

Ofset bosma. 6,0 shartli bosma toboq. 5,85 nashr toboq‘i.

Adadi 10000 nusxa. raqamli buyurtma.

Bahosi shartnoma asosida

Yoshlar nashriyot uyi. Shayxontohur tumani,

Navoiy ko‘chasi, 11-uy.